

## Sera sogn Martin a Lumbrein

**(pl) Da catschadurs, turists ed autras unfrendas han ils da Lumbrein survegniu novas a l'emprema sera sogn Martin ella casa communal da Lumbrein. Sonda vargada ha igl autur Leo Tuor prelegiu a l'emprema occurenza d'in usit nievnaschiu: la sera sogn Martin.**

Sonda vargada, cuort avon las otg la sera, han tuns da flauta empleniu la casa communal da Lumbrein. *Selina Derungs* da Vella, studenta da flauta traversa, ha sunau in intro ed empleniu la stanza cun ina atmosfera calda e speciala.

Avon la prelecziun dil poet da Val Sumvitg en la stanza beinpleina ha *Ramun Capaul*, il president dalla Pro Lumerins - l'uniun da cultura da Lumbrein - fatg in cordial beinvegni. *Anita Decurtins-Capaul* ha menau tras las sera ed ha all'entschatta presentau Leo Tuor, igl „autur, pastur, catschadur e bab da famiglia“. Specialmein remarcau ha ella siu temps sco redactor dalla Talina sco era siu temps da pastur. Tipic per il stil dil scribent Tuor seigi sia religiun culla natira sco era sia profunda scolaziun filosofica e suren vegni „il lungatg da Leo halt“, che scrivi sco buc in secund in romontsch datier al vierv plidau.

### Impuls e Capricorns

Leo Tuor ha entschiet sia prelecziun culs impuls, quei ein texts cuorts ch'el ha fatg pil radio rumantsch. Cun sia prelecziun plein tensiun ha el tschaffau il publicum e provocau bia risadas. El ha prelegiu texts tiel tema firaus, gusts, turissem ed auters - texts ch' eran tuts cungi cun ina buna purziun ironia.

Suenter ei vegniu tematisau „la catscha da capricorns en Cavrein“, quei ein texts che vegnan publicai dafertontier ella Quotidiana. Igl autur ha detg ch'el vegli cun quels texts „mussar da buc prender adina sesez sco catschadur memia impurtonts“. La catscha vegn ironisada empau ed era tut las massas da leschas e perscripziuns da catscha vegnan tschentadas tscheu e leu en damonda.

Suenter in intermezzo musical ei vegniu presentau il tierz bloc litterar: ina truvaglia, ch'appartegn buca allas ovras las pli enconuschentas da Leo Tuor: „Straglischs“ ord il carnet OSL. En quel descriva igl autur la Surselva ord sia vesta; las auas, la tecnica, ils pass, ils cuolms, la patria e.a.v. Igl autur ha prelegiu cheutier dus texts - las capluttas e las lavinas, texts che fan forsa gust da buca gest mo vegni deponi, mobein che animeschan ad atgnas reflexiuns.

La sera sogn Martin da Lumbrein ha buc mo mussau il talent dil scribent Leo Tuor, mobein era siu dun da preleger e da tschaffar il publicum – denteren era cun in u l'auter raquent ord sia relaziun persunala tier certs temas.

### Daco sogn Martin?

Cun tscharner in num d'in sogn vul la Pro Lumerins regurdar vid il temps che la veta quotidiana ed il calender annual eran spichentai cun firaus e veneraziuns da sogns. Quels gis purschevan in aspect special alla truscha quotidiana – quei che la Pro Lumerins vul era contonscher cun quella sera culturala. Cunquei che sogn Martin eri in dils enconuschents sogns dil temps d'atun e perquei ch'el seigi il patrun dalla baselgia parochiala da Lumbrein, seigi ei stau evident da sesurvir da siu num per titular las seras culturalas.

L'emprema sera sogn Martin ei segir stau in success e fa gust e marveglias sin autras semegliantas seradas.